



Ayat Suci Minggu ini

Yeremia 20:10-13
Mazmur 68:8-10, 14, 17, 33-35
Roma 5:12-15
Matius 10:26-33



“Tiada seorang pun harus memaksakan idea sendiri. Kita semua perlu saling mendengar.

Tiada seorang pun dikecualikan. Kita semua dipanggil untuk mengambil bahagian.

Tiada seorang pun memiliki kebenaran sepenuhnya. Kita semua perlu mencarinya dengan rendah hati, dan mencarinya bersama-sama.”

- Paus Leo XIV

Gerakan pertama dalam pertimbangan bersama komuniti ialah **penyerahan diri**. Memasuki pengalaman Perbualan dalam Roh bukanlah tentang memberikan renungan dan sumbangan yang lebih mendalam kepada kumpulan. Tugas yang lebih mendalam ialah menyerahkan apa yang kita “ingin katakan”, “ingin jadi”, atau “ingin berlaku” kepada Tuhan. Maka, persoalan utama ialah: Apakah yang Roh Kudus undang kita untuk temui dan usahakan bersama? Adakah kita rela melepaskan agenda, idea, dan pemikiran kita agar perkara lain dapat muncul? Menerima penyerahan diri ini merupakan satu kurnia yang membolehkan kita benar-benar bergerak dan bertumbuh sebagai satu Tubuh Kristus.

Gerakan kedua ialah **keterbukaan**. Roh Kudus berbicara melalui mereka yang dilantik, yang kelihatan, yang berpengalaman, dan lebih sering lagi, melalui golongan muda, yang kecil, dan yang paling tidak disangka. Jika kita benar-benar terbuka kepada Roh Kudus, kejelasan boleh datang daripada mereka yang tidak kelihatan, yang tidak diberi perhatian, mereka yang berada di pinggiran, dan yang terluka. Mungkin, mempertimbangkan bersama bermaksud kita terbuka sepenuhnya kepada suara-suara ini dan benar-benar mempertimbangkannya, dengan percaya bahawa Tuhan dapat berbicara kepada kita melalui mereka yang sering kita abaikan dan pandang rendah.

Gerakan ketiga ialah **sikap bertanggungjawab**. Sesuatu inisiatif, bersama dorongan dan kaedah untuk melaksanakannya, mungkin sudah mencabar dirinya sendiri. Namun, cabaran yang paling besar ialah bertanggungjawab terhadap apa yang telah kita tetapkan untuk lakukan. Keterbukaan untuk menerima maklum balas, melakukan penambahbaikan, dan membuat refleksi amat penting bagi memastikan kita terus mendengar isi hati komuniti, serta memahami bagaimana inisiatif kita membantu, memberi kesan, mengabaikan, atau menyokong anggota komuniti.

Hal ini melampaui sekadar membuat keputusan. Ia bermaksud terbuka untuk diubah oleh Roh Kudus, yang menyatakan dan membimbing melalui Tubuh Kristus. Dengan itu, pertimbangan bersama dalam komuniti menjadi satu bentuk pertobatan.

Sekali lagi, kita perlu bertanya kepada diri kita dengan jujur: **Adakah kita rela menyerahkan hasil yang kita inginkan? Adakah kita benar-benar terbuka kepada suara-suara yang paling tidak kita jangka? Dan adakah kita bersedia untuk memikul tanggungjawab atas apa yang kita pilih bersama sebagai Gereja?** ✚

NEWBEC

NEW WAY OF BEING CHURCH | Hari Minggu Biasa Ke-12 | 21 Jun 2026

BERJALAN BERSAMA KE ARAH SEBUAH GEREJA SINODAL DAN PROFETIK

Umat Untuk Pemuridan Misionari

FOKUS BULANAN: **GEREJA: Menghidupi Sinodaliti**



Mengarahkan Telinga Kita kepada Satu Sama Lain

Satu percikan menyalakan idea, gerakan, dan keberanian yang membolehkan seseorang berkongsi. Kemudian hadir pula sikap si pendengar, yang mengakui kekudusan dalam diri orang lain dan mendengar dengan tulus dalam Roh Kudus. Bagaimanakah gerakan ini mengambil bentuk yang nyata dalam komuniti kita?

Apakah gerakan-gerakan dalam pertimbangan bersama komuniti? Tindakan mendengar yang suci hanyalah permulaan. Apa yang telah dikongsi dan didengari kini perlu disimpan dalam hati dan dalam Roh Kudus, agar bersama-sama kita dapat mula mengenali ke mana Tuhan sedang memimpin komuniti.